



ISLA ONLINE

Noticia Transparente di Gobierno


Diahuebs 1 December 2022

Email: IslaOnline@gobierno.aw Tel: 528-4952

BON PASCO
FELIZ 2023



Gabinete Wever - Croes II




Siguiendo desaroyo di Aruba como Parlamentario Hulandes: **EX-SECRETARIO DI ESTADO DI REINO SEÑOR RAYMOND KNOPS TA IMPRESIONA CU MANEHO DI GOBIERNO DI ARUBA**

Durante su reunionnan na Tweede Kamer, Parlamento Hulandes na Den Haag diaranson 30 di november, Prome Minister Evelyn Wever-Croes a topa cu ex-Secretario di Estado di Reino señor Raymond Knops. Den conbersacion cu e ex-Secretario di Estado di Reino, señor Knops a expresa, den su posicion di Parlamentario miembro di Tweede Kamer, cu e ta sigui desaroyo di Aruba y ta hopi impresiona cu e pasonan cu Gobierno di Aruba a dal den su maneho y a expresa cu e ta contento di mira cu Aruba ta bayendo bon.

Prome Minister y Parlamentario Hulandes Knops a papia riba temanan concerni desde tempo cu nan a traha hunto den e temporada cu señor Knops tawata encarga cu asuntonan di Reino y tambe a toca temanan interesante riba e posibilidadnan actual pa Aruba.

Señor Knops tambe ta mira cu tin posibilidad y a presenta contactonan di personanan clave cu por yuda Aruba sea den reformanan, den desaroyonan of simplemente riba temanan financiero.

“E ta bunita pa mira cu apesar di cuanto discusion cu nos tawata tin, y diferencia di opinionnan varios biaha, pero semper, cu respet nos a logra yega na cosnan importante pa Aruba”, Prome Minister Evelyn Wever-Croes a expresa.



Premier Evelyn Wever - Croes:

A REUNI CU CENTRAAL PLAN BUREAU NA HULANDA PA MIRA CON ARUBA POR HACI MIHOR PROYECCION Y CALCULACION ECONOMICO



Manera ta conoci, Prome Minister Evelyn Wever - Croes ta actualmente na Hulanda pa atende diferente reunion den cuadro di Aruba su situacion financiero. Un di e reunionan cu tabatin tabata cu Centraal Planbureau (CPB) cual ta e instancia na Hulacu ta haci nda calculacionnan statistico y proyeccionnan pa e gobierno Hulandes.

Prome Minister Wever - Croes a splica cu Aruba ta den proceso pa mehora su calculacionnan y proyeccionnan economico. Den cuadro di esaki a reuni cu CPB pa mira con por mehora esaki pa evita cu ta haya hopi discusion ora trata introduccion di cambionan manera cambio di belasting y efecto financiero, cual tabata un punto di discusion cu CFT. Ademá, Prome Minister a indica cu mirando cu pa otro aña ta cumpli cu e normanan principal, ta purbando di soluciona otro asuntonan pendiente. Expertonan di Directie Financien a splica con nan ta haci proyeccionnan especialmente pa termino largo, y nan a indica cu nan ta haci mescos akinan.

Finalmente Premier Wever - Croes a bisa cu e reunion a bay bon. CPB a indica cu Aruba ta riba un bon caminda y cu nan lo yuda Aruba unda cu por. Considerando cu Aruba ta saliendo for di efecto di e pandemia, esaki lo yuda pa nos tin finansa publico sostenibel y duradero den futuro, Prome Minister a termina bisando.



Prome Minister Evelyn Wever-Croes:

GOBIERNO DI ARUBA A PRESENTA SR. ADY THIJSEN OFICIALMENTE COMO MINISTER PLENIPOTENCIARIO Y REPRESENTANTE DI UNION EUROPEO DI ARUBA NA HULANDA

“Nos tin hopi confiansa cu Ady tin a capacidad y tur cos pa eherce e trabounan aki y ta e persona corecto pa e trabounan aki”



Diaranson anochi durante un ceremonia ameno den presencia di embahadornan di varios pais, representantenan di Eerste Kamer, Tweede Kamer, Raad van State, Gobierno di Hulanda, representantenan di BZK, universidadnan y hogescholen, Gobierno di Aruba a presenta oficialmente sr. Ady Thijsen como e Minister Plenipotenciario y representante di Union Europeo pa Aruba na Hulanda. Señor Thijsen tin e responsabilidad pa honra Arubianonan cu ta biba na Hulanda, como tambe pa fortalece relacion den Reino y especialmente entre Hulanda y Aruba.

Durante e evento aki tabata tin un cantidad di persona presente cu a bin pa expresa nan gratitud y aprecio pa cu e relacion cu Arubahuis tin cu nan. Tambe a duna compliment na Gobierno di Aruba pa cu e manera con a maneha e pandemia. Hopi ta esnan cu a indica cu nan ta mira e desaroyo actual y con lihe Aruba ta recuperando. Prome Minister Evelyn Wever-Croes a expresa di ta hopi orguyoso pa scucha cuanto hende ta elogia y duna palabranan caluroso pa e manera con Gobierno ta trahando den bienestar di e pueblo.

Tambe, Prome Minister a indica cu e ta aprecia e presencia di e embahadornan di diferente pais na e evento aki, mirando cu relacionnan exterior no ta algo cu Aruba por haci riba su mes.



Relacionnan Exterior ta un asunto cu ta cay directamente bou di Reino. Actualmente, Prome Minister, den nomber di Reino mes ta haciendo esaki mirando e bon contacto cu su persona tin cu e diferente consuladonan. Pa por a topa y combersa cu e embahadornan di diferente pais ta algo hopi positivo. “Pa Aruba e ta di gran beneficio pa mantene un bon relacion cu e embahadanan di otro pais y p’esey ta importante pa Aruba tin un representante clave na Hulanda”.

Prome Minister dilanti tur presente a gradici señor Thijsen pa acepta e reto di ambos funcion y a expresa tambe di ta contento cu e trabou cu Señor Ady Thijsen ta bin ta haciendo y tin tur confiansa cu e lo sa di sigui representa pais Aruba den tur dos funcion debidamente. Tambe Prome Minister a gradici famia di señor Thijsen cu ta un sosten fuerte pa señor Thijsen. Sigur no ta algo facil pa laga bo pais pa asina sirbi bo pais den un pais leu manera Hulanda.

“Un dia manera awe ta yena mi di hopi orguyo di ta Minister President di pais Aruba. Gobierno di Aruba ta confia cu bo lo honra interes di Aruba y Arubianonan na Hulanda. Nos tin hopi confiansa cu bo tin a capacidad y tur cos pa eherce e trabounan aki. Bo ta e persona corecto pa e trabou aki”, Prome Minister Evelyn Wever-Croes a expresa.

Continuacion GOBIERNO DI ARUBA A PRESENTA SR. ADY THIJSSEN OFICIALMENTE....





CHAUFFEURNAN DI AUTOBUS LO SIGUI RESPETA INTEGRIDAD

Subida di tarifa cu 1 Florin NO ta drenta na vigor dia 1 di december 2022

Durante e ultimo dianan a tuma nota di diferente expressionnan di parti di chauffeurnan di autobus chikito encunto e subida di tarifa cu 1 Florin, indicando cu lo kier cuminsa cobra esaki entrante 1 di december 2022. Pero e proceso legal pa regla e tarifa nobo NO ta finalisa ainda.

Dia 18 juli Gobierno a duna un contesta positivo riba un peticion pa subi tarifa cu 1 florin. Esaki a bin tres dia despues di a ricibi un carta di chauffeurnan di autobus, fecha 15 di juli. Den e carta e chauffeurnan a expresa nan preocupacionnan y alabes entrega un peticion pa aumento di tarifa, en conexion cu entre otro e aumento di prijs di gasolin y diesel mundialmente. Den tres dia Gobierno a aproba esaki y den un carta a splica tur e consideracionnan y cu Minister di Transporte ta sostene e cambio di tarifa. Di biaha a inicia tambe cu e proceso legal pa haci esaki realidad.

Despues di e fecha aki a reuni na varios ocasion cu representantenan di chauffeurnan di autobus. Tanto den e carta como den e combersacionnan a splica cu Aruba ta un estado di derecho y tur hende mester observa ley. E proceso legal pa haci e cambio di tarifa tin cu cana su caminda via diferente departamento y institucion. Ta nifica cu maske di parti di Ministerio e proceso a wordo atendi cu tur prioridad, e parti legal di e proceso por dura algun luna. Actualmente esaki ta den su fase final y ta premira cu e proceso lo keda cla den un pa dos siman.

Esnan cu ta manda señalnan riba red social y medionan di comunicacion ta indica cu lo ahusta e prijs di autobus sin cu e proceso legislativo a termina oficialmente, ta haci algo no aceptabel. Autobus cu cobra mas di locual e maximo cu ley ta prescribi ta actua contra ley y tambe ta den violacion di e condicionnan di permiso. Integridad ta exige cu nos mester tene nos mes na leynan y procesonan. Esaki ta conta pa e minister, departamento y institucionnan gubenamental, y



tambe e ciudadano. E tarifa nobo lo drenta na vigor conforme ley y despues di publicacion.

Esnan cu cobra un tarifa cu aumento entante 1 di december 2022 ta violando ley vigente y tambe ta viola un condicion di nan permiso di autobus. Usuarionan cu wordo cobra un aumento di 1 Florin prome cu e tarifa nobo ta na vigor legalmente, por informa Departamento di Transporte Publico (DTP) riba nan tiplijn 5948660 (yamada of WhatsApp) of via info@dtg.gov.aw.

Tin comprension pa e situacion di chauffeur di autobus. Netamente esey ta e motibo pakico Minister a sostene e peticion y a inicia e proceso legal pa adapta e tarifa. Pero aprobacion di minister no ta mas halto cu ley y p'esey ta pidi tur hende pa observa ley y tambe e condicionnan cu tin poni den permiso individual.

Ministerio di Transporte lo informa ki dia e sistema di tarifa nobo lo drenta na vigor. E sistema di tarifa nobo ta ensera un aumento di 1 Florin di e tarifanan maximo di autobus pa pasaheronan te cu 59 aña. Pa adulto mayor di 60 aña bay ariba e tarifanan no ta wordo aumenta y lo keda igual na e tarifa actual.



1 DEC
2022

DIA DI DI IMPUESTO



Gabinete Wever - Croes II

Aruba
.....
.....
.....
.....



Minister Maduro ta informa riba trabounan na Hulanda:
ALGEMENE REKENKAMER DI HULANDA TAMBE
A HAYA UN BISTA DI E ESFUERSONAN HACI PA
MEHORA FINANSA PUBLICO DI ARUBA
E reto nos dilanti ta e pago di e debe acumula cu Hulanda pa
surpasa e pandemia



Minister Maduro di Finansa y Minister President Wever-Croes ta cu biahe di trabou na Hulanda pa asina por reuni cu varios persona y instancia pa brinda nan un bista riba e finansa publico di nos Pais. E mandatarionan a bishita Algemene Rekenkamer di Hulanda pa asina nan tambe por a haya un bista di e esfuersonan haci pa mehora e finansa publico di Aruba y e reto nos dilanti pa paga e debe acumula cu Hulanda pa surpasa e pandemia di COVID-19.

Nos Pais ta surpasando e efectonan di e pandemia y nos dilanti tin e reto pa paga e fiansanan haci na Hulanda bek. Algemene Rekenkamer ta controla e trabounan di Gobierno Hulandes y den nan trabou nan lo topa cu e fiansanan aki cu Hulanda a brinda na Aruba pa por surpasa e pandemia di COVID-19. E fiansanan haci cu Hulanda ta madura na oktober 2023 y prome cu esaki Gobierno Hulandes mester brinda claridad na Aruba cual ta e condicionnan pa e pago di e debe aki. E claridad aki ta importante ya cu Aruba kier mantene nos bon record di pago cerca nos creditornan internacional.




Minister Maduro ta di opinion cu ta bon pa Rekenkamer como un Colegio Halto di Estado Hulandes den forma adelanta por tin un bista riba e situacion financiero di Aruba, e esfuersonan haci promer, durante y despues di e pandemia y pa nan por ta bon informa tambe riba e capacidad di pago di nos Pais pa e debe acumula na Hulanda pa surpasa e pandemia di COVID-19. E miembronan di e Colegio di Rekenkamer a keda gradici di por a ricibi e presentacion detaya di Aruba su finansa publico.

Minister Maduro ta informa riba trabounan na Hulanda: A REUNI CU MIEMBRONAN DI RAAD VAN STATE SR. RICHARD VAN ZWOL Y SRA. MILY SCHWENGLE PA BRINDA UN BISTA RIBA E SITUACION FINANCIERO DI ARUBA

Minister Maduro a reuni cu sr. Richard van Zwol y sra. Milly Schwengle di Raad van State pa brinda nan informacion riba e situacion financiero di Aruba. Sr. Van Zwol conoce Aruba y semper ta traha tempo pa brinda nos un bon conseho. Sra. Schwengle ta representa Aruba na Raad van State y ta aprecia pa banda di keda na altura di e informacion financiero por keda na altura tambe di tur locual ta pasa riba tereno cultural na Aruba.

Raad van State ta un Organo Halto den Reino cu ta brinda conseho na Gobierno Hulandes. Ta importante pa nan tambe ta na altura di e esfuersonan cu ta wordo haci na Aruba pa yega na estabilidad financiero. Durante e reunion a toca tambe e reto nos dilanti pa paga e debe acumula cu Hulanda. Recientemente Raad van State a brinda conseho riba supervision riba nivel di Reino pa e parti financiero den e RAFT y pa reforma den e COHO. Ta consehonan cu ta relevante pa Aruba awor cu nos ta buscando claridad riba e condicionnan bou cual Aruba mester paga bek e debenan haci cu Hulanda pa surpasa COVID-19.



MINISTER MADURO DI CULTURA A BISHITA E COLECCION DI RITA MAASDAMME NA HERMITAGE NA AMSTERDAM

**Por medio di 30 diorama y 250 popchi di paña ta conta e historia di
sclavitud den Reino Hulandes**

Minister Maduro di Cultura a bishita e museo Hermitage na Amsterdam pa por admira e obranan di e artista Arubiano Rita Maasdamme (1944-2016), kende a trece scenarionan di nos historia di sclavitud den 30 diorama cu ta consisti di 250 popchi di paña traha na man. Rita su meta tabata pa tur hende por a siña conoce e pasado colonial di Reino Hulandes unda cu sclavitud a hunga un rol grandi. Pa Rita tabata importante pa tur mucha haya oportunidad pa haya sa di nan historia, pasobra esaki ta importante pa e desaroyo di nan propio identidad.

Den e 30 dioramanan por a mira escena di e historia di sclavitud conta fo'i e perspectiva di un Arubiano cu decendencia Surnam cu atraves di popchinan di paña bunita elabora, ta conta e historia di sclavitud cu no ta wordo hopi conta y pa e motibo ey no ta hopi conoci. Tin diorama ta ilustra e negoshi cu catibo, revolucion di Tula, bida riba plantage, abolishon di sclavitud, cuenta di Buchi Fil, etc etc. Tur diorama ta basa riba investigacion extenso haci pa Rita den literatura y tambe herencia cultural oral.

Na ocasion di e bishita di Minister Maduro y Minister President Wever-Croes na e Coleccion di Rita Maasdamme, e ruman muher y subrina di Rita, tabata tey pa asina brinda mas informacion riba e pasion y determinacion di Rita pa conta un storia cu hopi no conoce atraves di su popchinan cu e tabata yama criaturanan.

Minister Maduro ta gradici Hermitage Amsterdam y specialmente srta. Inez van der Scheer kende ta un Arubiano cu ta fungi como junior conservator di Museum van Amsterdam, pa e invitacion pa por a pasa admira e Coleccion di Rita Maasdamme. E mandatario ta extende un invitacion special na tur Arubiano na Hulanda pa pasa mira e Coleccion di Rita Maasdamme na Hermitage na Amsterdam pa haya sa mas di e historia di sclavitud den Reino Hulandes.

"Conoce cultura di otro pa asina siña comprende otro miho. Siña y balora bo historia, manifestacion cultural, y folklore, mira fo'i percepcion di yiunan di tera y no fo'i e percepcion di historiadonan Hulandes, ta di importancia eminente den e proceso di emancipacion"

- Rita Maasdamme -



Continuacion MINISTER MADURO DI CULTURA A BISHITA E COLECCION...





ANOCHI INFORMATIVO TOCANTE MALESANAN TRANSMITI SEXUALMENTE


Diaranson atardi dia 30 di November, DVG Health Promotion, Hospital Horacio Oduber conhuntamente cu Plataforma promocion di salud a tene un sesion di informacion pa tur hende cu ta traha den cuida. E anochi informativo aki a wordo presenta pa Dr. de Kort y Dr. Rodenburg di HOH.

E anochi informativo aki a tuma luga den preparacion pa e temporada di fiesta y carnaval. E focus di e anochi informativo aki tabata pa informa na sector medico y tur hende cu ta traha den sector di cuida locual ta trata e grupo di risico pa malesanan transmiti sexualmente. Tambe a duna mas informacion concreto tocante HIV, chlamydia, y e taboo cu ta existi rond di e temanan aki. Tur esaki ta den cuadro cu e Dia Internacional di AIDS, cual ta Diahuebs 1 December.

Dr. Rodenburg y Dr. de Kort a papia extensivamente tocante nan experiencianan den nan trabou, no solamente na Aruba, pero tambe internacionalmente. Nan a splica tocante e diferencianan den locual ta trata concienstisacion di e temanan aki y a duna hopi tips y informacion valioso den e contexto di nos comunidad. Tambe a splica pa locual ta trata e diagnostico, tratamento, cuida y na unda personanan por acudi den diferente caso.

Tambe Dr. de Kort a enfatisa tocante support groups den e casonan aki y con falta di esakinan ta afecta e proceso di diferente personanan cu ta haña nan mes enfrenta cu STDs, pero tambe pa gruponan manera e comunidad LGBTQ+. E ta menciona si cu ta mirando cambionan positivo pa locual ta trata esaki, y cu poco poco den nos comunidad ta creando mas concienstisacion.

Minister Oduber sigur ta manda palabra di agradecimento na DVG Health Promotion, Hospital Horacio Oduber conhuntamente cu Plataforma Promocion di Salud pa organisa e evento aki y asina comparti e informacion cu sector di cuida pero tambe cu nos comunidad. Esaki sigur ta valioso y importante mirando e dianan di fiesta cu ta na caminda.





MINISTER GEOFFREY WEVER A BIAHA PA HULANDA PA EXPLORA ALIANSA STRATEGICO PA DESAROYO DI SAN NICOLAS

Desaroyo di San Nicolas ta un parti esencial di e vision y maneho di Minister di Asuntonan Economico, Comunicacion y Desaroyo Sostenibel, mr. Geoffrey Wever. Den cuadro di esaki Minister Wever ta riba un biahe cortico pa Hulanda hunto cu Minister Glenbert Croes pa explora un aliansa strategico pa e desaroyo di e area industrial di San Nicolas. E reunion a tuma lugar diahuebs mainta.

Minister Wever ta kere firmemente den partnerships strategico pa logra resultadonan concreto y ta contento cu despues di e Trade Mission na Merca di september, na cual Minister Wever a participa como parti di e delegacion di Reino Hulandes, e contacto cu partnernan a continua.

Minister Wever a cuminsa caba cu trabounan pa revitalisa y desaroya San Nicolas door di duna San Nicolas atencion den su maneho nobo. E modernisacion di e maneho di permiso di negoshi – por ehempel – ta facilita pa direct foreign investors haya permiso di negoshi den area di San Nicolas.

Tin diferente sugerencianan prepara door di Comision Recuperacion Economico di incentivanan di inversion y incentivanan fiscal pa stimula inversion den e economia di Aruba cu atencion special pa desaroyo di San Nicolas. E international marketing campaign intensivo cu lo ser lansa dentro de poco pa promove Aruba riba mercado internacional, tin atencion special pa nos “Creative Industries”. Tin un proyecto den preparacion pa San Nicolas cual a wordo identifica hunto cu SNBA como e prome area cu ta bai desaroya pa asina por atrae turistanan y localnan pa bin bek San Nicolas.

“Nos compromiso ta cu San Nicolas y pa e motibo ey nos mester bai ‘the extra mile’ pa atrae inversionistanan pa San Nicolas y asina trece desaroyo pa San Nicolas y tur habitante conforme nos vision pa San Nicolas” – Minister Geoffrey Wever.

Diabierna awo Minister Wever ta regresa bek pa Aruba despues di e reunion pa explora aliansanan strategico pa desaroyo di San Nicolas.



MINISTER GEOFFREY WEVER TA DUNA GASTCOLLEGE STAATSRECHT NA STUDIANTENAN DI UNIVERSIDAD DI ARUBA DEN SALA DI PARLAMENTO



Diabierna 25 november, Minister Geoffrey Wever a duna un gastcollege na studiantenan di tweedejaars Bachelor di Facultad di Ley di Universidad di Aruba riba e tema di Staatsrecht. Esaki a tuma lugar den sala di parlamento mes, un experiencia special riba su mes pa e studiantenan.

Staatsrecht ta e derecho di estado cu ta regla e organisacion di estado. E ta trata e organonan di e estado, manera parlamento y gobierno, e institucion di e organonan aki, nan poder y nan autoridad, y e relacion entre e organonan aki y pa cu e ciudadano di e estado/pais.


Prome cu Minister Wever a bira politico, banda di su funcion como abogado, e tabata tambe Wetenschappelijk Medewerker di Staats- en Bestuursrecht na Universidad di Aruba. Como Wetenschappelijk Medewerker Staats- en Bestuursrecht, Minister Wever a cuminsa traha riba un promotietraject di Staatsrecht y tabata duna e vak tambe na studiantenan di Universidad.

Duna les ta algo cu Minister Wever ta gusta haci tambe. Aña pasa, despues di a bira Minister, Minister Wever a duna e gastcollege, y e aña aki atrobe. Den e gastcollege Minister Wever a splica e studiantenan con Parlamento ta funciona y con e relacion ta entre Gobierno y Parlamento, dunando asina e studiantenan e parti teoretico, e cuadro legal y e parti practico di Staatsrecht.

"Como minister ainda e ta un privilegio di por dedica algun tempo na comparti conocimiento bek cu studiantenan. Antes mi tabata bezig cu e parti academico di Staatsrecht, y awo como Minister, mi por añadi e parti practico di Staatsrecht por medio di propio experiencia. Ta interesante pa experiencia con Staatsrecht ta biba den sala di Parlamento " Asina e Minister Wever a duna di conoce.

Minister Wever ta desea e studiantenan hopi exito den nan estudio y den nan futuro carera profesional.






REUNION DEN CUADRO DI E MULTI-DIMENSIONELE FAMILIE THERAPIE (MDFT)

Recientemente, minister di Husticia y Asuntonan Social Rocco Tjon a reuni cu e participantenan di e opleiding di Multi-Dimensionele Familie Therapie (MDFT) como tambe Sr. Kees Mos kende ta e docente pa cu e opleiding aki. Durante e reunion aki, e mandatario a ricibi un actualisacion di con e opleiding aki ta bayendo. Mester bisa cu a scoge e metodo aki, mirando cu e ta uno prueba caba den exterior y di balor agrega, y e parti bon di esaki ta cu e chens pa yega na un solucion duradero, no pa e hoben so pero pa e famianan tambe, ta halto. Prome cu a inicia e opleiding aki, a scoge diferente organisacionnan pa tuma parti na esaki, pues asina por bisa cu e participantenan ta consisti di: Wit Gele Kruis; Fundacion Guami; KIA; Reclassering y Stichting Hunto.

Manera ta conoci, na Juli a introduci e MDFT, cual ta un metodo di terapia sistematico pa hobennan cu un of mas problema di conducta, principalmente problemanan di delincuencia of adiccion di substancia. E metodo di terapia aki lo brinda un ayuda duradero na e famianan di e hobennan aki, como tambe percura pa mitiga e riesgo cu e hoben por cay sera. Di otro banda e ta guia e famia pa na momento cu e hoben ser laga den libertad e por re-integra bek den e famia, caminda e famia mes tambe por yuda guia e hoben. Na september, e seis terapistanan a cuminsa cu e curso aki, cu un duracion di un año, pa asina mas pronto cu ta posibel, brinda e servicio aki na comunidad.

Por ultimo, mester bisa cu esaki ta un propuesta cu a bin for di veiligheidshuis, y den e sociale veiligheidsberaad lo bay determina con esaki por bay wordo aplica den e veld pa asina por tin mas persona cu por wordo opgeleid den e metodo aki. Minister Tjon, a indica di ta sumamente satisfecho cu e resultadonan te cu awo. Tambe, a indica cu Aruba ta e tercer pais na mundo cu a scoge pa introduci e metodo aki den prizon, pa di e forma aki, trata di brindanan un solucion duradero mas trempan, pues prome cu e personanan sali.





REUNION FRUCTIFERO CU REPRESENTANTE DI JULIANA SCHOOL



Diamars atardi den un esfera ameno Minister Endy Croes a reuni cu directora di Juliana School, sra. Paula Croes y sra. Alexandra Beumer riba diferente topico. Durante e encuentro a trata e.o. un posibel edificio nobo pa Juliana School.

Arkitecto, sr. Jouel Croes tambe tabata presente durante e reunion. Minister Endy Croes a expresa; nos ta creativo y tin luz na horizonte. Mandatario di Enseñansa ta traha cu porta habri y solucion concreto na bienestar di enseñansa di nos pais.

SINTONISA

**CONFERENCIA DI PRENSA
DI GOBIERNO DI ARUBA**

Gabinete Wever-Croes

Tur dialuna y diahuebs | 10:00 am

MINISTER ENDY CROES A CELEBRA DIA INTERNACIONAL DI PERSONANAN CU LIMITACION CU SVGA

Diaranson mainta den un esfera festivo na China Club Stichting voor Verstandelijk Gehandicapten Aruba (SVGA) a conmemora y celebra Dia Internacional di Personanan cu Limitacion. Tema di e aña aki: Hunto riba Mundo. Clientenan di Cas Blenchi, Pasadia Bibito Pin, Centro Man na Obra, Scol Dun'un Man, Pasadia Briyo di Solo y Cas Sjabururi a prepara un bunita show unda cada un a representa un pais a traves di un show di baile y musica. Durante e mainta ameno y alegre directora suplenta di SVGA sra. Elvira Arias - Tromp a hiba palabra como tambe Mandatario di Enseñansa y Deporte.

E dignatario a enfatisa riba inclusion, pa brinda oportunidad na cada persona cu limitacion pa nan por desaroya nan mes y haya un luga propio den comunidad. Minister Endy Croes a gradici comision organizado pa organisa un mainta asina ameno pa clientenan y a enfatisa cu SVGA por conta e sosten di Gabinete Wever – Croes II y sigur di su Ministerionan.

Concluyendo Minister Endy Croes ta felicita e clientenan cu duna un excelente presentacion. Alabes a expresa palabranan di gratitud na tur e docentenan, leidsternan cu ta eherce nan trabou cu hopi amor y pasion. Laga nos celebra e dia Internacional di Hendenan cu Limitacion den grandi y ban duna aprecio, amor y sosten na nos hendenan cu limitacion.





UN AÑA NOBO TA TRECE CU NE
OPORTUNIDADNAN NOBO PA HACI COSNAN NOBO.
LAGA NOS DEDICA AÑA 2023 NA NOS PAIS.
PA TRAHA PA E CRECEMENTO Y DESAROYO DI CADA CIUDADANO.
PA CADA UN REALISA NOS DEBERNAN
Y COMPRENDE NOS RESPONSABILIDADNAN.
PA NIUN DI NOS RINDI NA CAMINDA PA NINGUN RETO
PERO KEDA CU E MESUN DETERMINACION Y CURASHI
PA LOGRA PROSPERIDAD PA NOS TUR.

Bon Pasco y Feliz Aña Nobo.